



Llywodraeth Cynulliad Cymru
Welsh Assembly Government

DATGANIAD GAN LLYWODRAETH CYNULLIAD CYMRU

Title: Y Cynllun Bwrsariaeth Cenedlaethol
Date: 25 Mai 2010
By: Leighton Andrews, y Gweinidog dros Blant, Addysg a Dysgu
Gydol Oes

Gwnaethpwyd ymrwymiad yn 'Er Mwyn Ein Dyfodol: Strategaeth a Chynllun Addysg Uwch ar gyfer Cymru yn yr Unfed Ganrif ar Hugain' i lansio fframwaith bwrsariaeth cenedlaethol yng ngwanwyn 2010 wedi'i seilio ar egwyddorion tryloyw a chyson ledled Cymru. Bydd yn ategu'r camau a gymerwyd eisoes i ailwampio'r trefniadau statudol ar gyfer cymorth i fyfyrwyr i dargedu'r rheini sydd â'r angen mwyaf gan ddilyn argymhellion y rhan gyntaf o'r adolygiad o addysg uwch, a lywiwyd gan yr Athro Merfyn Jones.

Bydd bwrsariaeth genedlaethol Cymru wedi'i chynnwys yn y system statudol ar gyfer cymorth i fyfyrwyr mewn addysg uwch fel rhan annatod o grant dysgu'r Cynulliad a'r grant cymorth arbennig. Bydd yn sicrhau bod dull gweithredu cyson, tryloyw a theg a bod canlyniadau cyfartal i ddysgwyr ar sail prawf modd ar incwm. Bydd yr holl fyfyrwyr sy'n gymwys i dderbyn grant dysgu'r Cynulliad neu'r grant cymorth arbennig yn cael dyfarniad uwch, ymhle bynnag y maent yn cael eu haddysg ledled y DU. Mae hynny'n golygu y bydd nifer y myfyrwyr o Gymru sy'n cael budd o gymorth y bwrsariaeth yn fwy na'r nifer dan y trefniadau presennol, gan fod bwrsari cenedlaethol Cymru wedi'i gyfyngu ar hyn o bryd i fyfyrwyr o gartrefi sydd â'r incwm isaf un.

Bydd y trefniadau diwygiedig yn cael eu cyflwyno'n raddol ar gyfer myfyrwyr newydd o 2011-12 ymlaen a byddant yn arwain at gynnydd o hyd at £600 y flwyddyn yn y grant i fyfyrwyr cymwys o gartrefi sydd ag incwm gweddilliol o lai na £34,000 y flwyddyn. Caiff y trefniadau newydd eu hariannu drwy ostwng yn raddol y grant a roddir i Gyngor Cyllido Addysg Uwch Cymru. Bydd sefydliadau, yn eu tro, yn cael eu rhyddhau i wario cyfran fwy o'u hincwm o ffioedd dysgu'n unol â'u cenadaethau.

Gan y bydd bwrsari cenedlaethol Cymru'n rhan o grant dysgu'r Cynulliad a'r grant cymorth arbennig, bydd costau gweinyddu a biwrocratiaeth wedi'u cadw

ar y lefel isaf posibl, fel y gall mwy o arian gyrraedd pocedi myfyrwyr. Mae hynny'n unol â'm hadolygiad o gyllid addysg a'r angen iddo fynd at y rheng flaen.

Bydd y dull gweithredu hwn hefyd yn caniatáu mwy o ymreolaeth i'r sector addysg uwch yng Nghymru i benderfynu sut i ddefnyddio incwm o ffioedd dysgu. Ni fydd disgwyl bellach i sefydliadau dalu bwrsari cenedlaethol sylfaenol a byddant yn rhydd i wneud trefniadau ar gyfer eu dyfarniadau sefydliadol eu hunain. Bydd swyddogion yn cydweithio â Chyngor Cyllido Addysg Uwch Cymru a'r sector addysg uwch i addasu'r dull o drafod bwrsariau ac ysgoloriaethau gan sefydliadau addysg uwch.

Fy mwriad yw y bydd y trefniadau diwygiedig yn dod i rym ar gyfer myfyrwyr newydd o flwyddyn academiaidd 2011-12, i sicrhau nad amharir ar daliadau i'r myfyrwyr presennol. Yr wyf yn disgwyl i sefydliadau sicrhau y bydd y dyfarniadau presennol o gynllun bwrsariaeth Cymru'n cael eu talu i fyfyrwyr sy'n parhau â'u haddysg yn unol â'u cytundebau cynllun ffioedd. Mae'n bwysig bod myfyrwyr yn deall yr hyn y mae ganddynt hawl i'w gael a bod sefydliadau'n cyflawni eu hymrwymadau.

Yr wyf yn credu y bydd hyn oll yn arwain at gyflawni'r prif amcan o sicrhau canlyniadau cyfartal i ddysgwyr ar sail incwm. Bydd yn sicrhau bod cymorth ariannol wedi'i dargedu'n fwy effeithiol ar y rheini sydd â'r angen mwyaf a bydd yn rhoi cynllun cenedlaethol ar waith sy'n glir ac yn dryloyw. Bydd yn gostwng lefel y fiwrocratiaeth a'r costau gweinyddu drwy gynnwys bwrsari cenedlaethol Cymru o fewn grant dysgu'r Cynulliad a'r grant cymorth arbennig, ac yn sicrhau bod cyllid wedi'i ddefnyddio'n fwy effeithiol. Bydd yn cyflawni un o'r prif ymrwymadau yn 'Er Mwyn Ein Dyfodol: Strategaeth a Chynllun Addysg Uwch ar gyfer Cymru yn yr Unfed Ganrif ar Hugain'. Bydd cyfle i ymgynghori ar y cynigion hyn fel rhan o'r rheoliadau diwygiedig ar gyfer grant dysgu'r Cynulliad.